



Mediador Jerry Rasmijn a muri

ORANJESTAD(AAN)-- Ayera anochi a drenta e noticia tristo cu mediador di gobierno Sr. Jerry Rasmijn a fayece. Den e edicion aki por lesa mas di e caso tristo aki.

Diario . - (8 september 2009)

Den memoria di sr. Jerry Rasmijn:

Aruba a perde un ciudadano ehemplar y un gran luchado

ORANJESTAD (AAN) — Awe, cu lagrima na wowo mi ta sinta skirbi e relato aki, den memoria di señor Jerry Rasmijn, un ciudadano ehemplar y un gran luchado, ken repentinamente a fayece dialuna anochi.

Ainda ta fresco den mi memoria e mainta cu mi colega Django Simoons a drenta den mi oficina, presenta mi e cabayero aki y pidi mi pa mi entrevista. Cla, cla mi ta corda cu Django a bise "Jerry, bo ta keda den bon man".

Esey ta tempo cu despues cu e tabata miembro di directiva di e Sindicato SEPPA el a worde elegi como Presidente di e sindicato. E conversacion a bay hopi ameno y mesora mi a haya un respet inmenso pa un Arubiano asina inteligente, cu ken mi por a papia riba diferente tema. Prome cu mi a conoce sr. Rasmijn personalmente, mi a scucha su nomber na mi cas pasobra mi casa tabata tin un aprecio enorme pe, debi cu el a yude hopi bon cu un asunto cu e mester a regla cu Departamento di Finanzas. Mi a bolbe acerca e cabayero tan educa y gentil aki, despues cu el a bira Director Interino di Departamento di Labor. Mi a pidie un entrevista cu diferente pregunta cu mi tabata tin, basa riba

inkietudnan compila for di yamadanan di trahadornan, cu tabata confrontando cu cierto problemanan laboral e momentonan ey.

Señor Rasmijn tabata un persona sencio y di caracter humilde cu no tabata nenga prensa un espacio. Pero e entrevista mas amplio cu mi a tene cune tabata na momento cu e tabata cla pa drenta arena politico y cu mi a trece un relato tocante su estudio, trayectoria laboral y sindical, kico a motive pa e drenta politica, etc., y tambe nos a elabora e tema "familia". Como redactor, mi a logra descubri pa e lector, e curazon di un tata y casa ehemplar, un hombre conciente con importante un familia solido ta, ta na nivel individual como colectivo den un

comunidad.

Segun mi, el a laga e idea di drenta politica cay y tempo despues el a bira mediador di gobierno.

Semper mi a keda cu un aprecio enorme pa e cabayero aki, por cierto un Arubiano sumamente inteligente, cu incluso a drenta Universidad pa bira Hurista, pero segun mi el a bise mi cu door di falta di tempo, e no por a caba.

Cada entrevista cu sr. Rasmijn tabata placentero, pasobra e tabata haci hopi facil pa haci un entrevista skirbi na man of directamente den computer (kiermen sin worde graba) debi na su forma simple y cla di expresa den su lenga Papiamentu.

Pero tambe mi a keda admire pa su don di hende. Unda e tabata topa ami y mi casa, e tabata acerca saluda nos, puntra nos pa nos salud, pa nos yiunan, pa nos trabao y semper e tabata tin un tema interesante pa nos keda papia un rato cune. Pa mi, un cabayero den tur extension di palabra!

Un experiencia hopi agradable pa mi, a sosode

como tres luna pasa cu mi a hiba mi nieto na Oficina di Pediatra, anto mi a worde ricibi pa un dama hopi amable, cu a cuminda mi amistosamente y a bise mi: "Mi ta Cecilia Rasmijn, casa di Jerry".

Tabata algo masha bunita pa mi, ora nos a intercambia algun palabra y mi por a mira den señora Cecilia su smile y briyo den su wowonan con orguyoso e ta di su casa, cu sin duda, manera mi a bise, tabata tur un gran señor!

Palabranan di sincero condolencia ta bin di mi parti y di mi casa, ken a considera sr. Rasmijn un amigo y un gran sindicalista, pa su señora, yiu v demas familia, y tambe pa pueblo di Aruba en general, cu e desaparicion fisico di un gran luchado y ciudadano ehemplar. Cu señor Jerry Rasmijn sosega den braza di Nos Señor Jesus, y cu Dios duna su señora, yiu, henter familia y amigonan e forza y resignacion pa supera un golpi asina duro. Di profundo di mi curazon, Mercedes Abdul Hamid-Monge.